

Presidente CCDN sr. Frank Croes

Lo bay tin un celebracion grandi riba Plasa Betico relaciona cu Dia di Himno y Bandera

ORANJESTAD —Henter comunidad ta keda invita pa celebra Dia di Himno y Bandera riba Plasa Betico Croes. Riba e dianan cuminsando cu e feria cultural, e festival “Un canto na nos pais” y sigui pa contacto cultural, ta yega na e culminacion di e actividadnan cultural, cu ta e celebracion di Dia Nacional cu ta 18 di maart cu ta Dia di Himno y Bandera. Riba e dia aki e comision celebracion dia nacional tin un programa hopi atractivo hinca den otro.


E dia ei tin un manifestacion cultural riba 17 di maart, unda a hinca un program atractivo den otro, unda lo duna

honor na e musica di e gran compositor Padu del Caribe na su honor, unda cu gruponan di Aruba ta trece cancionnan di Padu padilanti. E di dos parti di e anochi ta bira un anochi dedica na Maybeline Arends Croes, kende a duna su contribucion grandemente durante añanan cu a pasa na e celebracion di dia nan nacional y e di tres parti ta edica na e pueblo di Aruba mes, unda cu e gandornan di e festival lo trece nan cancion na e publico un biaha mas.

Ta un programa hopi atractivo intercambia cu bailenan, durante cual e anochi tambe tin e costumbrando tentnan

unda cu pueblo por cumpra artesanianan local, relaciona cu 18 di maart, cuminda crioyo y un bar bon surti. Henter comunidad ta keda invita pa asisti masalmente un biaha mas y disfruta di un anochi hopi ameno. Dia 18 di mart lo inicia pa 9’or di mainta cu tocamento riba plasa cu orchestra harmonica di Aruba. Pa 10’or lo inicia cu e ceremonianan oficial, cu lo culmina atrobe cu e desfile di e gruponan uniforma di Aruba y asina lo termina rond di 12:30.

E publico ta keda invita despues den Cas di Cultura, unda cu eyden lo tin un



exposicion di Padu del Caribe prepara pa e pueblo. E aña aki atrobe ta bay tin un celebracion grandi y durante simannan den prensa lo bay tin mas detaye di e actividadnan aki.

Naturalmente durante dianan ey lo bay tin invitadonan di Curaçao, Isla Ariba y Bonaire, cu lo yega pa asisti na e celebracion grandi di pais Aruba.